

釋華嚴十明論叙

士十

宋寶覺圓明禪師惠洪覺範撰

顯謨閣待制朱公世英為余言頃過金陵謁王文公於鍾山公以彥里閑晚生有志學道謂曰若讀史見勾踐伍員事乎勾踐保栖會稽置膽於坐臥則仰膽飯食亦嘗膽也伍員去楚囊載而去昭關至蒲伏行乞於吳市二子設心止欲雪恥復仇而焦身苦思二十餘年而後遂其欲蓋有志者事竟成也然移此心以學無上菩提其何以禦之世英囑予記其言世英歿一年余還自海外築室筠溪石門寺夏釋此論追念平時之語曰嗟乎流轉三界未即弃去其恥亦大矣因縛五陰未能超出其仇亦深矣以吳楚之仇恥較之其相倍如日劫而學者亦思掣肘徑去然至誠惻怛勇決力行較勾踐伍員特太山毫芒耳豈不惜哉金剛般若經須菩提闍世尊言以恒河沙等身命布施不如受持四句偈為他人說之福於是泣下其心豈不謂學者多以一身味着懈怠故自為障闍乎夫雜華具四天

下微塵數偈而其所詮者如來普光明大智一法而已親近隨順此智者戒定慧三法而已以戒定慧觀照方便破滅無明一切衆生彈指實證故金剛藏菩薩曰隨順無明起諸有若不隨順諸有離是謂成佛顯訣入法要旨借令三世如來重復宣示深奧不能如毫末於此矣其於利害去取曉如白黑其義理昭著粲如日星不知學者於戒定慧何疑而不隨順於無明煩惱何戀而不棄遺乎孟軻曰今有無名之指屈而不信非疾痛害事也如有能信之者則不遠秦楚之路為指之不若人也指不若人則知惡之心不若人則不知惡此之謂不知類也今之知類者吾特未見耳豈密行暗證隱實顯玼世不得而知歟抑觀力羸浮習重境強多遇緣而退歟余切慕思大智者父子於道能遺虛名收實効三十年間決期現證皆獲宿智通入法華三昧乳中之酪此其驗矣嗚呼安得如南嶽天台兩人者與之增進此道哉政和五年六月十日書

解迷顯智成悲十明論

唐太原李通玄撰

釋十二緣生

夫十二緣生者是一切衆生逐妄迷真隨生死流轉波浪不息之大苦海其海廣大甚深無際亦是一切諸佛衆聖賢寶莊嚴大城亦是文殊普賢常遊止之華林園苑常有諸佛出現於中普賢菩薩恒對現色身在一切衆生前教化無有休息文殊師利告善財云不厭生死苦乃能具足普賢行一切諸佛功德海叅映重重充滿其中無有盡極與一切衆生猶如光影而無障礙以迷十二有支名一切衆生悟十二有支即是佛故衆生及以有支皆無自性若隨煩惱無明行識名色六根相對生觸受愛取有成五蘊身即有生老死常流轉故若以戒定慧觀照方便力照自身心境體相皆自性空無內外有即衆生心全佛智海如經頌云欲知諸佛心當觀佛智慧佛智無依處如空無所依衆生種種樂及諸方便智皆依佛智起如華嚴經佛子菩薩摩

訶薩有十種退失佛法道應當遠離何等爲  
十爲於善知識生憍慢心失佛法道畏生死  
若失佛法道厭菩薩行失佛法道厭惡受生  
失佛法道樂著三昧失佛法道於諸善根起  
疑惑心失佛法道誹謗正法失佛法道斷善  
薩行失佛法道樂求聲聞及緣覺乘失佛法  
道起嗔恚心失佛法道若修行者求大菩提  
心者無勞遠求但自淨一心心無即境滅識  
散即智明智自同空諸緣何立以空智慧光  
明普見法門入十住初心此如善財童子登  
妙峯山頂以明相盡法門故欲令其心轉更  
增勝上入海門國重觀十二有支生死大海  
見佛出興說普眼經及佛功德海諸波羅蜜  
海乃至禪波羅蜜方始一終又至十地中第  
六地作十度逆順觀察十二有支成般若波  
羅蜜門三空自在智慧現前以大慈大悲爲  
首故不盡諸行又以空慧入諸行海長養大  
慈大悲入生死海如蓮華處水而無染汚如  
阿修羅處海纜沒半身像大悲菩薩以空智  
隨流處纏不沒廣如經說今略叙其十法令

後學者不妄別求設使自外他求畢竟須明  
此理若厭十二緣生別求解脫智海者如捨  
水而求水逐陽燄以求漿若以上觀力照之  
心境總忘智日自然明白如貧女宅中寶藏  
不作而自明如窮子衣中珠無功而自現十  
門如下

第一明一切衆生十二緣生惡覺生死從何  
所生第二明十二緣生爲是本有爲是本無  
第三明諸佛解脫智慧爲是本有爲是修生  
第四明十二緣生與佛智慧誰爲先後第五  
明十二緣生及佛智慧有始有終否第六明  
十二緣生是一心所變云何受三界苦樂不  
同第七明解脫法中何法有依何法無依第  
八明諸佛解脫無有性相體無處所有無量  
功德有一佛刹微塵身土莊嚴互相映徹爲  
是有常爲是無常第九明一切諸佛皆有大  
願云誓度一切衆生盡方自解脫如今一切  
衆生無數云何無量諸佛已成現成佛者如  
無量刹塵豈不違其本自大願無量力耶第  
十明十二有支是大生死之源如何超度使

令迷解同佛大智大悲成大法門一切智海  
佛功德海

第一明十二緣生惡覺生死從何所生者爲  
一切衆生從本已來無本無末無始無終無  
性無相無古無今真智慧之體是一切衆生  
之本源也爲真智慧無體性不能自知無性  
故爲無性之性不能自知無性故名曰無明  
如華嚴經第六地不了第一義故號曰無明  
將知以真智慧本無性故不能自了既不自  
了是以諸佛更須示現出世說法利樂人天  
本無衆生可度既先賢得道利樂世間明知  
真智要得了緣方能現也若言真智本來自  
然常不變易者即有所依即有所住處即堅  
然形質十方虛空不可相容納也即同外道  
及二乘并淨土菩薩皆有所依故衆生自衆  
生聖自聖不須教化也故知有賢聖得道會  
真明知真智無性不得了緣但迷心境十二  
有支隨事染着不能自知有性無性妄作我  
見隨順無明行識名色對六根爲觸識爲種  
子意爲能緣隨事和合觸受隨生無明行二

事緣眼耳鼻舌身五根與名色相對無明行為所緣意為能緣名色是所緣之境識對諸根隨事和合分別善惡取納名受此一段五根從意及識七法為現行緣領受貪着不捨便生愛取有從愛取有三緣成來世業因生老死三緣為來世苦果此愛取有及生老死常以生老死為果生生無有停息隨自貪欲乘憍慢放逸貪嗔勝劣等業三界受生苦樂不同皆是自心變非由他與應如是知是一切眾生所生苦海之源以迷真智故便有業生十二有支因此而起若達無我則無所生處則一切法自性無生是故經云世間生滅皆由着我若離於我即無生處執着我故常求有無不正思惟起於妄行行於邪道罪行福行不動行積集增長於諸行中植心種子生有漏身復起後有生及老死所為諸業為田識為種子無明闇覆愛水為潤我慢漑灌見網增長生名色芽名色增長生五根諸根相對生觸觸相對生受受生已復希求生愛愛增長生取取增長生有有生已於諸趣中

起五蘊身名生生已衰變為老老已劣造業成病病已業盡為死死時生諸熱惱故憂悲愁歎眾苦皆集此因緣果故集無有集者此明經意為名第一義故妄生苦緣實可悲愍為迷心境枉流生死眾苦悲惱飄轉何休但淨意根空慧現前十二有支都無所有及名色識觸受等五法皆為根本智之法界自在緣生諸法門大海及諸波羅蜜諸功德海以明迷者即諸煩惱海一切心境總為苦海若覺悟者即是諸法門及波羅蜜海正覺悟時無明不見滅智慧不見生是故經云一切法不生一切法不滅若能如是解諸佛常現前此明迷解是故一切眾生於第一義根本無作智中妄起作業愛取有生是故十二有支迷真智慧生十二有支以為生源以此三乘法法諸般若中為中下種人但說五蘊十二緣空空亦空有為無為及畢竟空乃至十八空等皆未明達十二緣生煩惱苦海便為智海正覺海諸法門海諸波羅蜜海菩薩萬行諸功德海文殊普賢毗盧遮那三法皆悉圓

滿一一塵中十方諸佛及一切眾生同住無礙海法如是故非是權乘神通所作一切大小皆無邊方叅映重重重重無礙如經廣明第二明十二緣生為是本有為是本無者此中有二義一妄二真一如世情妄見隨三世古今為心計其萬事實有又計生死等以為無常此乃如世情心想所計言無常並是妄心妄想裁接無有窮盡言常無常並是虛妄無有定法皆不可依也言真如理智常不變易亦是虛妄是故淨名經云無以生滅心行說實相法以此十二有支是一切眾生自心自誑情計變生今言十二有支常以是虛妄若言無常法又以滅而取證或厭而往生者皆且得變化生死非真解脫是故常與無常同第一義智不可以情知也經云不了第一義故號曰無明又世諦即第一義諦云何十二有支定說為常及與無常又如正會第一義諦時不見身心及境界若生若滅常與無常是故十二有支無決定性不可說言常與無常同第一勝義諦故

第三明諸佛解脫智慧為是本有為是修生者此一段須知四謗言法本有增益謗言法本無損減謗亦有亦無戲論謗非有非無相違謗若言諸佛解脫智慧本有增益謗若言本無要假修生損減謗此之一段非情意思量言所及也情亡神會想盡智圓何以情論於有無談其無功之智也言其本有即體性如同虛空本來無迹言其本無因修而得者亡情慮而始會一乘若以滅識亡情亦非是當一切眾生以情想恒存者常迷不知存修即卻敗放逸即全乖若言本有修生皆為過失何以然者言本有一切眾生元來是佛何因苦樂流轉不停若言修生還成敗壞有為之法皆是無常故須除此二障方可相應乃故頌曰諸法不自生亦不從他生不共不無因是故說無生此乃禪定觀行方便以為了緣迷解自明不可以情慮計度云修生本有此果體無以斟酌知無以思量得當以上觀力功熟方乃證知急亦不成緩亦不得但知不休必不虛弃如乳有酪皆須待緣緣緣之

中無作者故其酪成已亦無來處亦非本有如來智慧以戒定慧眾善方便而以照之而緣緣之中無作者無成壞故然於一切智一切種智於中而得朗然於諸法中無能作所作者故亦非本有亦非本無以第一義中無本無末無始無終無成無壞無三世古今亦不可作本有及以修生成就世間斷常諸見及諸諍論應如是知如經中頌云一切法不生無有常見一切法不滅無有斷見若能如是解諸佛常現前以無斷常故即是成佛義也是故不可作修生本有卜度之妄想也重裁妄想不可相應當須於一切法無心道自現也無心道現正智方明正智現前方覺心境諸緣自皆無性心境無性智日同空境何能立智空境寂識浪無生所有現行都無能所如空谷響應物成音空谷無心智亦如是應物分別都無所生於此是他同於幻住所有心境皆如不見一法有生住異滅成壞等相名法界緣起自在無生門如善財至德生童子有德童女所得空幻智幻生幻住法門

一切處受生皆同幻住

第四明十二緣生與佛智慧誰為先後者如世情識妄業所見者即十二緣生生死在前若以道現智明古今元來不變無動轉故已是無量劫中所作善惡業果報德道現智明悉能見之如彌勒樓閣中善財入已彌勒三世古今業行悉於中現者是也以自淨智業圓明十方諸佛及一切眾生三世古今業行無不普現以無明總盡一切智成自合如是但淨自心不可希望如世間初心但且息心淨念者亦得少分外邊生死境界所現故求大道者不取也不可以螢光滯於大智之明此是攝亂息心所見也亦有邪鬼入身亦見少分皆不可取也善決擇之如十地菩薩得百萬阿僧祇三昧世無不明坐大寶蓮華之上量等百萬三千大千世界授如來職其身充滿大蓮華之上此大蓮華四邊次有十三大千世界微塵數蓮華以為眷屬諸菩薩皆坐其上尚猶於普賢行猶為障礙欲見普賢菩薩不能得見當捨五障方見普賢略釋

中已明善財欲入大悲位但見摩耶夫人處寶眼天具明五障之數何況世間息念少分淨心怕怖生死畏懼攀緣之心而少分可見亦為障道未作須作已作須過勿滯其中一依善財童子所有十住十行五位行樣不錯也如是根本大智之海不可更求前後之見皆從迷十二緣生之法於心境上意識魔王妄變自惑其心至無始沉淪由迷不覺存前存後見古見今第一義中都無此也一切處文殊師利同聲說偈云一念普觀無量劫無去無來亦無住如是了知三世事超諸方便成十力又以大智體中同三世事以過去世入現在未來世以未來世入現在過去世以現在世入未來過去世以根本智無三世性妄執三世智現自圓無古無今一世通為十世以三世中一世上三世為九世通平等世為十世如圓珠上求方環輪上求始末虛空中求大小中邊前後際終不可得應如是知如是見即於大小前後諸見無所惑亂也如是見盡三世都忘名初發心時便成正覺

然後成普賢之行矣

第五明十二緣生及佛智慧有始有終者如有人於少時間夢見無量劫忽然睡覺所有夢中時量劫數並不可得亦如是見無明及佛智慧亦不可得為無明等十二有支及佛智慧皆虛妄也經云無無明亦無無明盡乃至無老死亦無老死盡為真妄總同一虛空性故不可於空中求其生滅等相不見無明滅不見智慧生以無生滅故一切法亦如是無生無滅無始無終也

第六明十二緣生是一心所變云何受三界苦樂不同者金剛藏菩薩云於第一義諦不了故名曰無明所作事是行行依止初心是識識共生四取蘊為名色無明行識名色為四名色增長六處六根是也根境識三事和合是觸觸生受於受染著是愛愛增長是取以從此愛取中不順貪嗔忿恨各隨執業深淺輕重種種不同因此惡道人天諸業各各差別修行者大須觀察淨治識種以現智門而於心境即得自在餘意下當更明

第七明解脫法中何法有依何法無依者聲聞獨覺皆厭生死依寂滅涅槃淨土菩薩厭生死所依淨土般若中菩薩破有歸空成空智慧應生淨土畱惑潤生教化眾生如涅槃中依一切眾生有自性清淨亦具普賢行俱是三乘中諸教菩薩等法門國土皆有大小廣狹所依分量可得皆有所依故為眾生根品量度未圓所有修行心量各依自分所得唯一乘佛果毗盧遮那文殊普賢理智大悲圓滿皆徧至六道眾生及三乘菩薩二乘聲聞緣覺一切所依皆徧故十方克滿猶如虛空皆無所依非大小限量廣狹所依住也亦非情想計度所窮任無功無作大智之所印也以達十二緣生法中迷解智現故無厭除心無自他境不出不沒智印十方無去無來恒對現色身普徧一切眾生前無去無來故亦無神通變化之心以無所作之智法爾能隨物應感現其身宜應所化也如空谷響普應諸聲皆無所依一切眾生及諸賢聖皆無所依但以自情妄見也但智明迷解道自

如是非是情所作得也故名不可思議更有餘意後當更明

第八明諸佛解脫皆無體相本無處所所有功德身土莊嚴為是有常為是無常者如來報身及國土三界淨土菩薩所知見故乃至

十地菩薩受職位但見如來出世三昧涅槃

解脫身土功德微妙境界猶不能見成佛果德已後恒行普賢行常處世間十方六道無休息行亦不能見也如十地道滿欲見普賢行以十地中三昧力三度倍倍入無量三昧

畢竟不見普賢身及所有境界况如來果後恒行普賢行十方國土悉徧於中功德如何見也如華嚴經世界成就品如許雜類世界如來行普賢行之徧處如華嚴即是文殊師利化入人間覺城東大塔廟處轉說此經號普照法界修多羅經於大海中有無量百千億諸龍而來其所聞此法已深厭龍趣正於佛道成捨龍身生天人中一萬諸龍發大菩提心得不退轉有無量無數眾生於三乘各得調伏移城人間文殊師利童子莊嚴幢

娑羅林中大塔廟處無量大眾從城而出來

詣其所略舉優婆塞優婆夷童子童女各言五百入法之眾以是義故但以文殊師利轉

教人間若如來報身及國土諸天十地菩薩及淨土諸菩薩所不能見何况二乘及凡夫

得見此出過眼耳鼻舌身情識之境界不可

云常無常生滅比量如來身及國土妙相不可以形質量礙所分劑知一一毛孔皆無有邊際所得一切功德身不可以世間情所卜度言常及無常皆無決定之體不屬生滅性故不可以妄知

第九明一切諸佛皆以大願度眾生令盡若

一眾生不盡者我不取正覺如今現有無量眾生在以有無量諸佛已成現成佛者豈不違其本願力也如十方世界不見一佛已成

現成佛者常行普賢行處十方世界度脫眾

生無古無今不出不沒但以眾事宜應所見成佛及以涅槃無作菩提何得何證何成何壞但以普賢行願常然恒利眾生而無利者但以無作之智性自徧周應現解迷本無成

壞也正迷解時不見迷已不見智慧如善財

入慈氏之門入已還合以諸法中實無一法有成壞故若於諸法中見有佛成佛者是無

常義如涅槃經自具明文勿生疑滯第十明十二有支是大生死之源如何超度

使令迷解同佛大智大悲成大法門一切智

海佛功德海者如華嚴經第二會普光明殿中說十信門如來足下輪中十度放光其光從如來眉間毫相中出照耀十方世界已來入佛足下輪中以明佛果光以佛果光用成

信位其光名一切菩薩智焰照耀十方藏其

狀猶如寶色燈雲以此光明從足輪中出初照三千大千世界令修行者隨光心作光明想徧照三千大千世界作此想成已其光明照於東方十三大千世界四維上下亦復

如是次第一周一一方所想成十方過此是

初觀第二次第乃至第十倍增廣量度想念皆盡虛空令其自心亦盡虛空心同虛空其心自定朗然安樂方從定還起十方觀四維上下周徧推求自心內外都無所得方始

了知空慧現前名憶念一切諸佛智慧光明  
普見法門在此位中定亂俱忘名初發心住  
以此空慧觀察世間一切衆生及以國土皆  
如幻化無有體相同佛空慧解脫法門入佛  
知見已以此名念佛門以無念正慧相應故  
入十方境界念佛門空慧自性普周徧故及  
一切佛成正覺轉法輪三世劫在一時無時  
分延促之相可安立故如經廣明入此十種  
廣大如虛空量念佛門方入海門國第二治  
地住法門方廣達十二緣生海成普眼經及  
成十波羅蜜行海佛功德海入清淨無染大  
悲蓮華無垢大智普光明海如經云善財童  
子問言欲入一切無上智海而未知菩薩行  
云何能捨世俗家生如來家如是十問具如  
經說海雲比丘十種讚慰勸發之後方云我  
住此海門國十有二年常以大海爲其境界  
所謂思惟大海廣大無量思惟大海甚深難  
測總勸十種觀察十二緣生生死大海使見  
大海之下有大逆華忽然出現以觀心圓淨  
生死無染業成十無盡寶莊嚴十王供養恭

敬明十智波羅蜜功德不出生死之海於生  
死大海之中利樂衆生無染自在以王表之  
阿修羅王云百萬者檀波羅蜜中行滿也手  
執持其莖明不離根本智處生死而不沒以  
阿修羅王表之已下思之表法如是餘可准  
知設有其事亦爲表法衆也蓮華有佛出現  
說普眼經者觀達十二緣生根本普光明智  
起差別智普現一切名色色聲香味觸法虛  
空等隨一切衆生欲皆說爲經衆生無盡心  
想無盡對彼根欲以世間萬事應所宜說之  
爲教有何盡耶經云以大海量墨須彌聚筆  
書寫此普眼經法一品中一門一門中一法  
一法中一義一義中一句不得少分何況能  
盡知我於此佛所千二百歲受持如是普眼  
法門以十隨羅尼門爲諸人天龍神等廣宣  
流布以十二緣中一緣之上有百煩惱十二  
緣中以爲法門故云千二百歲但是一切賢  
聖所說不離四諦一切世間不離苦集一切  
解脫不離滅道一切苦集不離無明乃至一  
切諸緣行等十方隨事各各不同如華嚴四

聖諦品是諸修行者一一依十信十住十行  
十回向十地及普賢等覺位自明若不徧學  
不徧知住一法中莫知進路一乘之教即以  
普光明根本智以爲信解勝進之門以智無  
三世古今之體還以不移剎那際成大菩提  
依智成教不立古今智圓三世多劫不離一  
念以智無延促無有去來智體同空本無廣  
狹不可以分劑知不可以增損見雖有勝進  
功高時節不移毫分三乘之教以立三僧祇  
劫佛果在十地之終聖智依根立教如是樂  
之者即作勿疑聖旨致有沉吟恐作空過以  
十信之住六品經文還於普光明根本智殿  
中說還以十箇智佛以爲十信云覺首目首  
通文殊師利以爲所信之行首也金色世界  
及一切處金色世界及下九箇世界總通爲  
十是所信之法十箇世界皆名爲色所謂金  
色世界妙色世界等以十信之心是生滅心  
生信解故還如漸卦鴻漸於干磐等類是也  
略且如是不可具言十二緣生十住中第二  
住亦觀成普眼經也六地菩薩亦觀十二緣

生生起因緣成無障礙智慧光明令後學者  
觀之論主頌曰

凡夫無智慧 執着生於我 常求於有無  
不能正思惟 妄行於邪道 罪行及福行  
乃至不動行 常於諸行中 植心之種子  
生諸有漏業 成於後有身 生死恒流轉  
諸業以為田 識心為種子 無明以為覆  
愛水以為潤 我慢為澆灌 諸見生名色  
名色既增長 五根由是生 諸根對名色  
識種隨受觸 觸受既增長 愛取生諸有  
有生五蘊身 生已有衰變 老壞皆歸死  
死時生熱惱 憂愁眾苦集 以此常流轉  
生於六趣身 此中無一物 虛妄故如是  
能以禪悅心 心念無虛妄 方能起空慧  
普照於十方 是中無一物 能於無物中  
方現如來智 既得智光已 復照諸眾生  
常於十方刹 具足普賢行 以化眾生故  
而於佛果門 安立信住地 十行十回向  
十地等覺位 使令修行者 修行不失錯  
十信是生滅 十地入佛位 以此佛位中

饒益眾生故 解脫智無染 名之為十行  
以此解脫行 迴入生死中 周徧十方界

廣利諸羣生 名之為回向 常於生死中  
長養大慈悲 名之為十地 仍於生死海  
樂着解脫心 涅槃三昧樂 以除五種障  
安立等覺位 成就普賢道 如於十住中  
初住第二住 乃至第三住 而於佛果海  
觀察十二緣 多求出世心 三比丘表之  
四住五住中 便以解脫心 返照世間境  
及以十二緣 一切眾塵勞 無不恒清淨  
身心無內外 十方悉無礙 一切皆禪林  
與諸如來等 以明返照世間是解脫以彌伽  
十二年行方至以表十二緣 第六住位中  
生觀連一終  
出世及世間 如是二解脫 皆悉總圓滿  
寂滅大神通 無功神慧滿 以海嶼比丘表  
復思覺神用無 第七方便住 廣度諸眾生  
方皆悉自在也 長養大悲行 以滿願優婆夷  
表之 毗目瞿沙仙 能隨邪見流 以同諸佛眾  
令入清淨智 住處與前同 俱名為海岸  
以表智慧同 第九婆羅門 號名為勝熱

明九波羅蜜 能同邪見林 五熱及刀山  
從空而投火 摧伏諸苦行 悉令入正見  
第十灌頂住 於智波羅蜜 以明十住滿  
以智行慈悲 師子幢王女 如此十住中  
以十波羅蜜 和會智慈行 各各皆不同

勝進故如是 乃至十行中 十向十地中  
及以等覺位 一一諸位中 波羅蜜行別  
互參各不同 不離初發心  
右已上法門皆如來普光明智為體差別智  
為用使令智慧充滿以為法界大乘經云十  
二有支皆依一心而立隨事貪欲與心共生  
心是行 於行迷惑生識行識共生名色  
名色增長六處三分合為觸 六根為分觸共  
生是受受無厭生愛愛攝不捨是取彼諸有  
支生是有有所起名生熟為老老壞為死  
以下經云十二有支皆 有種業如經自具明也 於十二有支為三苦  
一無明及行六根是行苦觸受是苦苦餘是  
壞苦 受取有生 以無明滅三苦總滅即得三  
空三昧空三昧無相三昧無願三昧於一心  
境無有願求唯以大悲為首教化一切眾生

故二乘觀十二有支空煩惱總滅智慧大慈  
大悲亦滅菩薩觀之諸緣由性空無生無滅  
無受命者教化衆生不滅諸行乃至十空三  
昧現前常恒不捨一切衆生廣如經說十二  
緣生法雖一法一切賢聖皆於中作觀各各  
獲利不同十波羅蜜一法五位菩薩勝進各  
各名目德用不同不可一向准之  
解迷顯智成悲十明論

解迷顯智成悲十明論

校勘記

一 底本，清藏本。

一 一四頁中六行第一六字「如」，  
作「加」。

一 一九頁中一九行第七字「願」，  
作「物」。